

12 SEP 2003

LAPORAN-SOSIAL

KUALITI HIDUP RAKYAT TELAH BERTAMBAH BAIK

KUALA LUMPUR, 12 Sept (Bernama) -- Usaha kerajaan dalam mengekalkan kesejahteraan ekonomi rakyat telah berjaya meningkatkan secara menyeluruh kualiti hidup rakyat Malaysia, demikian menurut Laporan Ekonomi 2003/2004.

Biarpun terdapat kebimbangan terhadap sindrom pernafasan akut yang teruk (SARS) dan beberapa serangan penganas di negara-negara jiran, Malaysia terus menikmati suasana sosio-ekonomi yang aman, harmoni dan stabil, menurut laporan yang dikeluarkan oleh Kementerian Kewangan itu.

"Perkembangan ekonomi yang berterusan telah menyumbang kepada pertambahan pendapatan per kapita kepada RM14,343 pada 2003 daripada RM13,683 pada 2002. Seiring dengan ini, pariti kuasa beli turut meningkat daripada AS\$8,862 tahun lepas ke AS\$9,390 pada 2003."

Laporan itu menyatakan, sebagai langkah mencapai pertumbuhan yang lebih seimbang dan perkongsian kekayaan yang saksama, sebanyak RM2.56 bilion, iaitu pertambahan sebanyak 36 peratus daripada tahun sebelumnya, telah dibelanjakan bagi pelaksanaan program di luar bandar.

Ini meliputi perkhidmatan lanjutan pertanian dan subsidi baja, jalan kampung, bekalan elektrik dan air, klinik kesihatan desa dan sekolah.

Kira-kira 12,400 isi rumah telah mendapat manfaat daripada program elektrik luar bandar melalui perbelanjaan RM99.5 juta, manakala di bawah projek bekalan air luar bandar, tambahan 41,300 isi rumah telah dibekalkan dengan air bersih pada kos RM102.4 juta.

Jalan luar bandar dan kampung juga telah dibina melalui pembinaan 7,600km jalan luar bandar dan jalan kampung, dengan kos RM582.7 juta di 126 daerah di seluruh negara.

Menurut laporan itu, pakej rangsangan ekonomi yang diumumkan oleh Perdana Menteri Datuk Seri Dr Mahathir Mohamad, yang juga menteri kewangan, Mei lepas, telah membantu menangani isu-isu sosio-ekonomi.

Bagaimanapun, sejajar dengan tujuan kerajaan untuk menyediakan lebih banyak rumah yang mampu dimiliki, Syarikat Perumahan Negara Bhd (SPNB) akan membina 150,000 yang rumah mampu dimiliki oleh kumpulan berpendapatan rendah.

"Satu program pemilikan rumah yang unik juga telah diperkenalkan, yang mana, askar, polis, balu kepada kakitangan kerajaan dan ibu tunggal yang belum memiliki rumah layak mendapat rumah yang disediakan kerajaan melalui peraturan sewa-dengan-pilihan-untuk-beli pada kadar RM50 sebulan," menurut laporan itu.

Laporan Ekonomi itu menyatakan, sehingga akhir Julai, SPNB sedang dalam proses untuk menyewa 40 unit rumah pangsa kos rendah manakala 450 unit sedang dalam proses untuk diperolehi oleh SPNB dibawah program ini.

Dalam hubungan menangani masalah sosial khususnya dalam membanteras penyakit sosial, kerajaan telah melancarkan Dasar Sosial Negara bulan lepas untuk meningkatkan pembangunan sosial melalui penerapan nilai-nilai murni pada semua peringkat masyarakat di seluruh negara.

Laporan itu juga menyatakan, penglibatan organisasi bukan kerajaan telah melengkapkan usaha masing-masing, terutama sekali dalam penjagaan orang kurang upaya dan orang tua, menunjukkan wujudnya semangat kesukarelaan sosial yang kukuh di negara ini.

"Bagi pengiktirafan peranan mereka dalam membina negara, RM67.8 juta telah disediakan sebagai sokongan kewangan kepada organisasi bukan kerajaan bagi membantu meningkatkan keberkesanan dalam memberikan perkhidmatan termasuk kebajikan, penjagaan orang kurang upaya, pembangunan keluarga,

hemodialisis serta pemulihan penagih dadah. -- BERNAMA
SR JR